



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :



Tir Yimiyim



tiryimiyim@aolima



tir yimiyim

TAPAK 8

Excise policy nung AAP-i sùbokrem agiba kuli mali: Arvind Kejriwal

Klopp melena Arne Slot shimtsù mulungtepogo



VOL. XXI ISSUE NO. 195 (ADOK 195)

DIMAPUR AMUNGNÜ (SUNDAY)

RONGCHII (APRIL) 28, 2024

₹ 5.00

NCD-i state sorkar dang mapa inyaksù ayongzüker

Dimapur, April 27, 2024 (TYO): Nagaland nung shishilembartemi tashiyim agi sen meshiba aser tim masüba tax saruba anema lungkak aitba atema sorkari mapa meinyakra Naga Council Dimapur (NCD)-ia mapa tenzüksü metetdaksüo.

Sorkari teinyaksü tim meinyakra civil society originations aser tribal hohos ajunga anidener noktaksü ta NCD-i ashi.

NCD-i April 27, 2024 nü senden ka ayonga amenba sülen Nagaland chief secretary dangi shidi ka zülüogo.

Honibarnü NCD-i kin hohotem aser telok balala den ajurutepa senden amendang state sorkari iba tebilemstü süoki ia agizükba aser National Security Act kübok tashiyim agi sen meshiba aser tax saruba ken o tem benoktsü tetuyuba agütsüba atema pelaba metetdaksü.

Naga political groups shinga nem-a ozüngi memelaba tax mesüra tashiyim agi sen

mesarudaktsütsü. Shishilembartem aser public dang nungi ozüng alema sen meshiba tera ya Naga yimten tebilemstü lir anungji India sorkar dang tekaratiba nung Naga yimten latettsü atema nenshitsu ta NCD-isa metetdaksü.

Dimapur district nung shishilembartemi mapang telatet makai dokantem shibangba pusema nungiter saka tarutsü anogotem nungbo temelaba magii Dimapur district nung bandhs/ strikes amala mayongdaksütsü ta NCD-isa ashi.

NCD-isa Dimapur Chamber of Commerce and Industry (NDCC) aser Nagaland state sorkar dang anogo ana tsüngda ken o angatetteptsü mapang atakzüksüo.

Maneni, NCD-isa Home department aser district administration nem anogo 45 tsüngda unions, association aser welfare organizations ajak reprangshitsu mapang atakzüksüo.

KCCI-i Apr 29 nü mokdang anena atatsü

Kohima, April 27, 2024 (TYO): Kohima Chamber of Commerce and Industry (KCCI)-i tanü nungi Kohima nung mapang telatet makai shishilembabaren shibangtsü tenzükogo.

Dimapur Chamber of Commerce and Industries (DCCI)-i ayongzükba pusema KCCI-i yashi ghonda 12 mokdangba sülen ano Confederation of Nagaland Chamber of Commerce and

Industry (CNCCI)-i lemtetba sülen anidaka tanü nungi shishilembabaren ajunga anenogo.

KCCI-isa April 29 nü Kohima nung 'CNCCI indefinite shutter down' salatsü aser iba ya public lijaliyongtsü asoshi lapoktsüba metetdaksüo.

Anogo ka atema dang mokdang lapoktsür aser CNCCI indefinite shutter down tenzükba osang public nem metetdaksütsü ta KCCI-isa ashi.

Nagaland aser India sorkartemi NPGs nem sen agütsü nung koda? DAYO

Dimapur, April 27, 2024 (TYO): Nagaland nung tax aser tashiyim agi sen saruba khuret koktettsü atema Nagaland aser India sorkartemi Naga Political Groups (NPGs) nem senotsü teyari agütsü nung koda ta Dimapur Ao Youth Organisation (DAYO)-i tebilemba ka lemsatopogo.

Dimapur nung dang masü saka Nagaland ajungalen tax saruba aser tashiyim agi sen meshiba khuret agi timtemer anungji iba khuret agientsü atema teinyaksü kar inyaksüla ta DAYO-i tanü metetdaksü.

Tanü Nagaland nung shishilembartemi mapang telatet makai shishilembadak shibangba ajanga iba khuret ya kangasa ulura ta asüba sayur. Ajisüaka shishilembadak shibangba ajanga dangba iba inyakyim tamajung ya mokoktettsü ta DAYO-i ashi.

DAYO-i Dimapur nung yimjung aser terenlok wazüka ayutsü atema bendanga agüja

inyaker. Iba tangatetba nung ajemdaker tax saruba khuret pungpatsü atema Nagaland aser India sorkartemi yimten olemtep metembang tashi Naga Political Groups (NPGs) nem senotsü teyari agütsütsü shidanger, kechiyong iba khuret ya sensotemi joko makoker aser iba jagi dang shishilembadak shibangogo, ta Media Cell-i sangdong ka nung metetdaksüo.

Tashiyim agi sen meshiba aser tax saruba ajanga nübortem timtemer aser iba ajanga Dimapur renloka aotsüba nunga tetsükdaksü agütsür. Asenok kati ka temeten akhümtsübutepa iba tebilemstü asoshi külemi inyakra asen yimti aser sensotem tarutsü ajungtsü atema lenmang lapoka yutettsü ta DAYO-isa ashi.

Dimapur aser tangalen renloktsü aser azükarutsü atema sendaktepa alir ajak longjemer inyakyim tasentem pusemstü ayongzüker ta parnokisa ashi.

CNCCI-i April 29 nü 'window period' atema metetdaksür

Dimapur, April 27, 2024 (TYO): Sorkar nungi telangzüba tajung kecha maliba agi mapang telatet makai shishilembadak shibangba maneni alitsü saka lijaliyongtsü mapang agütsütsü ta Confederation of Nagaland Chamber of Commerce and Industry (CNCCI)-i metetdaksüo.

Nübortemi nungdakattem lijaliyongtsü atema 'window period' ka alitsü lemtetogo kechiyong district aika nung public nem jelia osang memedaktsüi kanga ajungbena dokantem shibanga liasü, ta CNCCI-isa ashi.

Anungji DCCI tem dang April

29, 2024 anüngdang 12:00 ako nungi nikongdang 6:00 ako tashi nübortem lijaliyongtsü atema 'window period' agütsütsü metetdaksür, ta CNCCI Chairman Dr. Khekugha Muru aser General Secretary Dr. Seyievilie Mor nati taonung sangdong ka nung metetdaksüo.

DCCI-i Nagaland sorkar dang nungi onük 5 akhanger

Dimapur, April 27, 2024 (TYO): Dimapur Chamber of Commerce and Industry (DCCI)-i state sorkar nem onük pungu takhangba agütsüo.

DCCI-i Chief Minister dangi züluba shidi nung shishilembartemi iba ama tensa ka nung inyaksangshitsu mouteter anungji nendaka mapa inyaksü ayongzükba lir.

DCCI-i state sorkar dang nungi Naga Political Groups

(NPGs)-i tax meshiba ya ozüngi melaba mesüra memelaba mapa ka ta asüngdangogo.

Shishilembartemi NPGs nem GST mesüra Tax agütsütsü asü masü ta DCCI-isa sorkar dang nungi telangzüba meshir.

Shishilembartem NPGs Offices, Camps aser Monitoring Cells-i jaokba ya ozüng alema inyakba mapa ka ta sangdongtsü aser ozüng amertem nem tashi agütsütsü atema DCCI-isa

akhanger.

NPGs-i duplicate products, MRP tempering, expiry checking amala mapa inyakba ya ozüngi memelar ta sangdongtsüla aser iba mapa inyakterem merenshitsu ta parnokisa sorkar nem takhangba agütsüo.

DCCI-isa tashiyim agi sen meshiba, nisung pur aoba aser len tom nung transport sota ayuba maparen anema inyaksü takhangba agütsü.

Küm 6 tsüngda taküm HSLC results tajungba

Dimapur, April 27, 2024 (Agencies): Nagaland Board of School Education (NBSE)-i Hokolbar anüngdang High School Leaving Certificate (HSLC) aser Higher Secondary School Leaving Certificate (HSSLC) examinations 2024 results metetdaksüo.

2019 nung HSLC overall pass percentage 68.29%, 2020 nung 70.03%, 2021 nung 69.42%, 2022 nung 64.69% aser 2023 nung 70.32% liasü.

NBSE-i February 13 nungi 23 tashi Class 10 tatidang aser February 12 nungi March 6 tashi Class 12 tatidang agia liasü.

HSLC nung kaketshir 22,136-i tatidang agütsüba nungi parnok 15,588-i takok nguogo.

HSLC tatidang nung Christian Higher Secondary School, Dimapur nungi Mhachilo Yanthan-i tematiba jenjang (98.83%) takok angu aser la sülen St. Paul School, Phesama nungi Ketsino Jane Frances-i tanabuba jenjang (98.67%) angu.

HSLC jenjang tasembuba nung nisung ana Holy Cross Hr. Sec. School, Dimapur nungi Pabitra Deb aser M.G.M. Hr. Sec. School, Dimapur nungi Amina Begum nati takok angu.

Maneni, Little Flower Hr. Sec. School, Kohima nungi Tsiurile V. Thonglii, Pranab Vidyapith Hr. Sec. School, Dimapur nungi Sucharita Mahajan aser Carewell School, Dimapur nungi Victor Sunep Dowarah nungi jenjang pezübuba aser Cosmopolitan School, Chumoukedima nungi Shazia Farzana-i jenjang pungububa takoktem nguogo.

Sorkar school temi takok anguba district telemsa

reprangdangra Kohima nung 67% lir. Parnok sülen Tseminyu nung 61% aser Phek district nung 60% lir. Sorkar school tem rongnung pass percentage tamajungtibaji Shamator district (3%) lir.

Külen, nija school tem reprangdangra Tseminyu district nung pass percentage 93% lir. Parnok sülen Kohima o Mokokchung nung 90% lir.

Taküm HSLC tatidang nung Children with Special Needs 22 liasü aser parnok 12-i takok nguogo.

HSSLC exam nung Arts stream nung Dainty Buds, Kohima nungi Keletsole Mekro (97.40%), Commerce nung Holy Cross Hr. Sec. School, Dimapur nungi Satyam Kumar Jaiswal (98.40%) aser Science stream nung Queen Mary Hr. Sec. School, Mokokchung nungi Narola Imsong (96.20%) nungeri tematiba jenjang takoktem ngutetogo.

Taküm tatidang nung Arts stream nung overall pass percentage ji 83.16%, Commerce stream nung 87.67% aser Science stream nung 80.88% lir.

HSSLC Arts stream nung sorkar school asem-Mayangnokcha Govt. Hr. Sec. School, Mokokchung (Rank 5); Govt. Hr. Sec. School, Chümoukedima (Rank 5) aser Bautüng Govt. Hr. Sec. School, Longleng (Rank 8) nungi toppers 3 lir.

Children with Special Needs category nung kaketshir 14 liasü aser parnok 10-i takok nguogo.

DoSE-i Class 11 admission atema metetdaksür

Department of School Education (DoSE)-i April 29,

2024 nungi Government Higher Secondary Schools ajak nung Class 11 admission maparen tenzüksü osang metetdaksüo.

GHSS ajak atema Online Admission Portal ka dang alitsü aser kaketshirtem mesüra tsüraburtemi website <https://education.nagaland.gov.in> nung 'GHSS Admission Portal' nung applications agütsütsü metetdaksüo.

Kaketshir kati pa/lai mulungba school aser stream balala atema application agütsütsü akok aser portal ya April 29 nungi May 1, 2024 tashi lapoktsü. Kaketshirtemi HSLC Admit Card aser Mark Sheet copy tem upload asütsüla ta DoSE-isa metetdaksüo.

Maneni, kaketshirtem/ tsüraburtemi 'Admission Form' download ser May 1, 2024 matongdang school tem nung agütsütsü akok ta parnokisa ashi.

Iba sülen May 3, 2024 nü 'GHSS Admission Portal' nung 'List of Selected Candidates' den 'Waiting List' adoktsü aser portal nungsa Admission Fee osang metetdaksütsü.

May 3 nungi May 4, 2024 tashi kaketshirtemi pei pei school nem Admission Fee (Offline) agütsütsü aser May 6, 2024 nü Waiting List nung alir nem menden tazüngtem lemezüksütsü, ta DoSE-isa ashi.

Taküm nungi TMGHSS Kohima aser GHSS Noklak nung Science Stream tenzükker aser GHSS Hakhusang, Tuensang o GHSS Lengrijan, Dimapur nungbo Arts Stream atema Offline Mode nung dang admission agitsü ta DoSE-isa metetdaksü.

Angh-i Children's Home Sports Day moatsü



Dimapur, Rongchii/April 27 (TYO): 3buba Children's Home Sports Day 2024 April 27 nü Holy Cross School, Dimapur nung mungogo. Sentong nung Nagaland Ang La. Ganesan alakteta jaoker liasü. Iba sentong ya Bambi Kevichusa lenisüba nung agia liasü.

Sentong nung o jembiba mapang Angh-i, Team Better Dimapur-i ayongzükba sentong nung alakteta jaoker ama shilem agitsü maongka anguba atema kanga pelar, ta ashi.

Paisa, sentepa aliba lokti dang, "asenok ya asayamung ka nung shilem agir aser repranger ka dang masü, saka asenok ya katika asoshi aria bilemtepa aser telungjem nung shilem ka lir aser tanur 200 dak tema parnok sempet, meranga inyakba aser sportsmanship sayutsü atema renema aliba tejak reprangtsü atema adenshiba lir," ta ashi.

Anghi-i ashiba agi, iba sentong ya tetoktepa ka dang masü, saka iba janga telungjem, diversity nung tashi aliba sayur aser nukjidong ka asoshi longjemba ajanga takok ngutetba kuli agütsüba benjung ka lir. Annual Children's Home Sports Meet ya tesem aser jenjang balala nungi tanurtem anidentsü atema sabang tajung ka lir aser iba den parnok nem akhümtsübu sayutsü, tangatetep nung alitsü aser longjemmer inyaksü atema sayutsü atema lir, ta pai ashi.

Maneni pai ashiba agi, sportsmanship tanüla benjungba den külemi iba sentong ajanga lokti nung tekübokba jenjang nung aliba lokti koda tongtibang iba indang nüburtem nem tangazükba agütsür. Iba ajanga nüburtem nem lokti nung pei tata shilem lir ta angatetdaksür.

Angh-isa, iba amala sentong tajung ayongzükba agiba atema

Team Better Dimapur nem tenüngsang agütsü aser asayamung nung shilem agirtem ajaki pei akokba tashi tajungtiba shilem agitsü imlaja ataba lemsatep.

Sentong nungsa Dimapur Deputy Commissioner, Dr. Tinojongshi Chang-i, sentong tajung ayongzükba agiba atema Team Better Dimapur nem tenüngsang agütsü.

Paisa, nisung taküm nung saisapong ya koda tongtibang iba indang lemsatetpa den district administration-i iba amala inyakyim maneni nongita yaritsü ta tenangzükba agütsü.

Maneni Deputy Commissioner-i, iba sentong takok asoshi teyari agütsürtem ajak dang kanga pelaba lemsatet. Pai, saisapong ajungkettsü atema district administration bendanga agütsür lir aser iba amala inyakyim ya maneni nongita yaritsü ta ashi.

Teenage Pregnancy awareness sentong agi

Dimapur, Rongchii/April 27 (TYO): District Administration aser District Hub for empowerment of women (DHEW) Longleng den Nagaland Aids Control Society (NSACS), Longleng longjemmer April 27 nü Lempong convention hall Longleng nung 'prevention of Teenage Pregnancy' dak sendakba nung awareness sentong ka agiogo.

Sentong nung shilsalen sayurji Counsellor District Hospital Longleng, Lithei Phom liasü.

Shisalen sayuri Consequences-physiologically, psychologically & socially Prevention, Health Education, school, kidang aser tekülemdak Life Skill Education agütsütsü kodang tongtibang item onüktem dak ajemdaker jembi. Lai ashiba agi, anojungi mashisa akümba ya sex education tapet magütsüba ajanga lir.

Laisa, tanur asüba mapang ano tanur ka anitetsüji kanga tasak lir aser iba ya nokdangtsü atema lanurtemi pei tarutsü atema temulungtetba tulu alitsüla, inyakyimtem kümdanga shimtsüla aser takok tashi nüktabangta nungi pila alitsüla, ta ashi.

Sentong nungsa okila jembiba mapang DMC DHEW Longleng, P. Phungla Phom-i, kaktshirtem dang iba amala sentong ya kanga süoki ia agitsüla aser iba sentong nung densemba ya maongka tulu ta agitsüla ta ashi.

Iba sentong ya Afen Phom lenisüba nung agi aser Longleng jila kübok school balala nungi class 9 nungi 12 tsüingda aliba kaketshirtemi shilem agia liasü. Maneni sentong nung Assistant women Pastor Longleng Town Baptist Church Chingkhong-i Tsüingrem temaotsü meshizüka sarasadema liasü.



Dimapur, Rongchii/April 27 (TYO): Career dak sendakba nung kaketshirtem nem tangzükba agütsütsü nüngdakba temulungdang yur Tizit nung amendaker aliba Sub-divisional officers tem aser Tizit Town Students Union na longjemmer April 27 nü Literary Fest den repsema Career Counselling sentong ka ayongzükba agiogo. Iba sentong nung ADC Mon, K. Temjennaro Longkumer alakteta jaoker liasü.

State kübok district balala nung World Veterinary Day mungogo



Dimapur, Rongchii/April 27 (TYO): Alima ajunga nung World Veterinary Day amungba anogo state kübok district balala nunga April 27 nü iba anogomung ya ayongzükba mungogo.

Dimapur nung iba sentong ya "VETERINARIANS ARE ESSENTIAL HEALTH WORKERS" omen nung ajemdaker Veterinary Hospital, Dimapur nung munga liasü.

Iba sentong ya Dr Imlimenla Imchen Dy CVO, i/c CVO, Dimapur lenisüba nung agi aser Dr Michael Imti Imchen, VAS-i omen dak ajemdaker o jembiba den Tir osang lemsatetpa liasü. Mezüingbuba sentong tembangba sülen anti- rabies vaccine angati agütsüba sentong ka agi, kong shiruru 250 nem vaccine agüja liasü.

Medziphema nunga iba sentong ya Veterinary Field Assistant Training Institute (VFATI), Medziphema nung mungogo. Iba sentong ya Department of Animal Husbandry and Veterinary

Service, Nagaland-i senotsü teyari agüja Nagaland Veterinarians Association-i ayongzükba liasü.

Iba sentong nung ADC Medziphema, James Swu alakteta jaoker liasü aser pai, shiruru aser nüburtem ajangzüktsü atema shilem tajung agiba atema Veterinarians tem nem tenüngsang agütsü. Sentong nungsa Nagaland Veterinarians Association (NVA) Tir Dr. K.N. Zubemo Humtsoe, Dr. H. Inato Jimomi Principal (VFATI) aser Dr. K.N. Zubemo Humtsoe nungeri o jembia liasü. Iba sentong ya Dr. Anguale Khate lenisüba nung agi.

Kohima nung iba sentong ya "Veterinarians are essential health workers" omen nung ajemdaker Veterinary Hospital Kohima aser Chiephobozou nung mungogo. Sentong nung Chief Veterinary Office, Kohima-ia shilem agia liasü.

Sentong nung Dr. Ilang, Chief Veterinary Officer, Kohima-i, World Veterinary Day ayongzükba amungba indang

lemsatet. Paisa, food security, ecological balance, biomedical research, aser rongsen terenlok nung veterinarians tem indang shilem lemsatetpa liasü.

Iba sentong ya Dr. AtuzoPienyu, VAS Kohima lenisüba nung agi aser Dr. Aonungla Jamir, Veterinary Assistant Surgeon (VAS) Kohima-ia rabies indang metetdakaja liasü. Sentong nung anti-rabies vaccine angati agüja liasü.

State ajunga den jangyu medema Tuensang District nunga World Veterinary Day ya April 27 nü CVO Office Tuensang nung mungogo. Sentong nung o jembiba mapang Dr. Aojongshi Chang F/M, SCRC-i, Veterinary Day amungba ya koda tongtibang iba indang lemsatet, kechiyong iba ajanga healthcare aser public health ajungketba wadang nung Veterinarians temi koda tongtibang shilem agir, aji jangjadaksü aser parnok nem tetushi agütsür, ta ashi. Iba sentong ya Dr. ViluhJakha

VAS (MVU) Tuensang lenisüba nung agia liasü.

Maneni Wokha district nunga iba anogomung ya Veterinary Hospital, Wokha nung mungogo. Sentong nung o jembiba mapang SDO (C) Nuhuta Tunyi-i, Veterinary department nem shiruru aser nüburtem health jenjang ajungkettsü atema parnok mapa tajung asoshi tenüngsang agüja liasü.

Dr. Yanben Kikon, VAS-i "Veterinarians are essential health workers" omen nung ajemdaker o jembia, Dr. Gwazenlo-i African swine fever poktetba indang metetdaksü aser Dr. Kheshelie, Epidemiologist District Hospital Wokha-ia o tatsüka jembia liasü.

Wokha nung iba sentong ya Dr. Mhonlumi Lotha, Chief Veterinary Officer, Wokha lenisüba nung agi, Dr. Sentinungla AO-i lokti pela agizükba o jembia aser Dr. Wopenthung Odyuo-i tepela o jembia liasü.

Kiphire nunga April 27 nü Veterinary Hospital, Kiphire nung World Veterinary Day 2024 mungogo. Sentong nung District Livestock Development officer (DLDO) & Chief Animal Husbandry and Veterinary Services Officer Kiphire incharge Dr. Tsulise-i omen dak ajemdaker o jembia liasü. Sentong nungsa Dr. Talitemjen Longkumer VAS aser Lithrongtsi, Junior F/M natia o tatsütsü jembia. Iba anogomung nüngdem nung field workers balala nem parnok mapa tajung

asoshi tetushi agüja liasü. Dr. Khumjungse VAS lenisüba nung iba sentong agi aser James VFA-i tepela o jembia liasü.

Kasa mapang nung Department of Animal Husbandry and Veterinary Services, Zunheboto-i ayongzükba North Point Colony, Zunheboto jila nung World Veterinary Day mungogo. Sentong nung nüburtem nem kiset shiruru nem mapang shitak nung vaccine agütsütsü koda tongtibang iba indang tangazükba agütsü aser iba ajanga zoonotic tashidak nokdangba nung koda tongtibang shilem agir iba indang lemsatet. Kasa anogo Dr. Vilitoli Y. Kiba(VAS) aser Dr. Enavi P. Kiho(VAS) nati anir animal health camp ka ayongzükba agi aser angati anti-rabies vaccine agüja liasü. Angati animal health camp ajanga aluyimer 35 ajangzükogoo aser shiruru 126 nem vaccine agüja liasü.

Phek district nunga World Veterinary Day ya Jericho Colony Hall, Phek nung mungogo. Sentong nung Dr. Esther Krocha CVO, Phek & Finance Secretary NVA-i okila jembia, Dr. TshokeduKeyho VAS, Khezhadako-i NVA Tir o zünga metetdaksü aser Dr. Velilu Epao o Dr. Rosou Pohena VAS, Pfutsero nati "Public Health & Zoonosis" aser "Rabies Prevention & Control" dak sendakba nung Powerpoint presentations agüja liasü.

MULUNGNEN O



Wt. Sakunungla Ayoklar (Akhoya)
30:01:1935 - 01:04:2024

Ozü temeim tsürabur tajung Wt.Sakunungla Ayoklar taküm alidang la nungdak ajak nung yaritepertem aser la iba lima nungi April 01, 2024 nü pilar onok mangyim jashi nung alidang temeim agi onok dak malangba nebo, rongsen, sarasadem aser tesünep o tajung agi yaritepertem ajak dang onoki kanga pelaba Mulungnen o ka yangi lemsateper.

Ojala aser Otsüla ya teindang aser meranga inyakba taküm ka liasü. Lai la taküm nung Tsüngremer nükjidong angateta alitsü merangogo. Iba ama tsürabur ka moatsüba atema Tsüngrem dang onoki kanga Pelar.

Onok timtem aser teyari kanga nungdakba mapang kija-kibong, kidang-kiyonger, tembar-medemer, yimten, arogo aser lokti tentetemi onok nungita yariba agi onok tesünep aser tashi tulu nguogo. Nenoki onok dang aria bilema inyakba temeim mapatem ajak asoshi onoki nenok dang kangasa pelar.

Tsüngremi nenok temeim mapa tajung meyipa moajangma ta onoki sarasademtsür.

- Temeim Kinungertem

Excise policy nung AAP-i sübokrem agiba kuli mali: Arvind Kejriwal

New Delhi, April 27 (Agencies): Enforcement Directorate (ED)-i Supreme Court nem agütsüba affidavit atema Honibarnü Delhi Chief Minister, Arvind Kejriwal-i telangzüba agütsüogo.

AAP tongti aser Chief Minister Kejriwal-i Supreme Court dang, Delhi excise policy ken o dak sendakba nung AAP-i sübokrem agiba kuli mali, ta metetdaksü.

Kejriwal-isa, Lok Sabha election agitsü atema sangdong agütsütsü mapang ana nung lia aser Model Code of Conduct (MCC) benokli pa apuba ya ajanga ED asalentong kar aliba kuli sayur, ta ashi.

Tang Tihar jail nung alisang Delhi Chief Minister-isa, AAP-i South Group dang nungi senotsü agi mesüra sübokrem agi, ta AAP nem tai tongloktsütsüsa kuli kecha mali, ta ashi.

Kejriwal-i affidavit ajanga

Supreme Court dang, "Senjang ka danga AAP den sendaktepa mali, aser iba dak sendakba nung tai tonglokja aliba atema kuli kecha mali aser tajemdakdak kecha mali," ta metetdaksü.

Kejriwal-isa, Delhi excise policy nung ochimashi liasü, ta tai tonglokja bushisüngdangba ken o nung Enforcement Directorate (ED)-i tashi tali amshir, ta aitsü.

Aam Aadmi Party (AAP) tongti lenirisa, ED-i Supreme Court nem agütsüba affidavit nung, pa apuba kuli rongnung kaji, pa tekuben tashi jaokyonga pai investigating officer (IO) matsüngdangi maruba agi liasü ta shia lir, ta metetdaksü.

Kejriwal-i, ED-i pa jaokba mapang shia pai ED nem osang tejangja den telangzüba agütsüogo, aser ibaji ED-i mimshitsü makok, ta ashi.

Paisa, pa temepishibaji agizüksü aser chioktsü temsüa lir, ta ashi.

Kejriwal atema okatsüri Supreme Court dang, Kejriwal apuba ya Centre nung BJP-i aniba sorkari yimtenren nung tanemer tulutiba (AAP) jenjang raksatsütsü atema central agency tim masüba nung amshiba lir, ta aitsü.

Kejriwal atema okatsürisa, "Election nung yimtenren inyakyim kanga mazüngi aliba mapang ka nung temepishiba ken o agütsür (Kejriwal) ozüng alema apuba ajanga temepishiba agütsüsanger party tim masüba nung takoksa angutsü aser tan election nung Centre nung ruling party-i tim masüba nung maongka angutsü," ta metetdaksü.

Tamalen aliba Delhi excise policy nung ochimashi liasü aser sübokrem agi, ta tai tonglokja iba ken o dak sendakba nung taküm March 21 nü ED-i Arvind Kejriwal'er ki mita oa pa dang ghonda asem shi asüngdangyaba sülen pa pua liasü.



Amritsar, April 27, 2024: Sikh Guru, Tegh Bahadur asoba anogomong nung Amritsar nung aliba Golden Temple nung Sikh nungertemi noklangnok amer shilem agiba noksa nung angur.



METETDAKTSÜR

Dimapur Waromung Senso Telongjem Moatsumong, Anogo
2nd May 2024, 10:00 AM ako nungi lir.

Anungji yimtsür, yimer aser anukapang ajak Dimapur Waromung Senso Telongjemi pelashishia jaoker. **Tesentepdak: Kimen, Wb. Imtingangshi Lemtur**, Near Ao Baptist Church, Padumpukhuri, **RSVP Contact No: 8798958078**

Sd/-
(MAPUMEREN LONGKUMER)
President

Sd/-
(TEMSUMEREN LONGCHAR)
General Secretary



CHANGKI MISSION

HQ - Changki
District - Mokokchung



"Tsüngremer Tenyaba Nung Arok Shilem"

Tongti O Jembir

Rev. Dr. L. Anjo Keikung

Anogo | Mapang
2nd May 2024 | 11:00 AM

Tesentepdak
Baptist Church Changki

Jubilee Lapokba

Changki Laisüri Longjem

i/c Ketdangpurtem

Menden

- 1. Telok Ken : **Dr. T. Senti Longchari**
Home Evangelist, DCF
- 2. Lai Zünga Sarasademtsü : **Tsüngrem Dang Sentsüwangshi**
: **Rev. L. Moa**
Ex. Pastor, CYBA
- 3. Pela-a Agizükba/
Asür Bilemetetba Mapang : **Mr. T. Wati Longkümer**
President, Changki Mission
- 4. Tepela O : **Shri. Temjenmenba Pongen**
Hon'ble Advisor Transport &
Technical Education Govt. of
Nagaland
- 5. Jubilee Tenla Bendenba Mapang : **Mr. I. Sünep**
Pastor, MBA
- 6. Temeja Ken : **Choir, Baptist Church Changki**
- 7. Tayongzükba O : **Shri. Imkonglemba Ao**
IAS (Rtd.)
- 8. Tsüngrem Dang Sentsüwangshi : **Mr. S. Chujang Changkiri**
Mission Promoter
- 9. Otsü Kaket Lapokba : **Rev. I. Imlila**
Assoc. Pastor (W), CYBA
- 10. Temeja Ken : **Choir,**
Changki Yimlang Baptist Arogo
- 11. Onük:
"Tsüngremer Tenyaba Nung Arok Shilem"
- 12. Melepzüng O : **Mr. C. Lima Longchari**
Convenor Jubilee Planning Committee
- 13. Tatem Ken : **Kintem Dang Ashitsü Otsü Ka Lir**
- 14. Sarasadem : **Mr. Allen Amri**
Pastor, BCC

Changki Mission, Silver Jubilee Planning Committee-i May 2, 2024 nü anüngdang 11:00 ako nungi Baptist Church Changki nung agitsü aliba Jubilee mong sentong nung Tsüngremi ajungba aser temoatsü lemsateptsü atema Changki nunger ajak, anukapangtem, medemertem aser temeimertem ajak adentsü pelashishia jaoker.



TIR YIMYIM YIMOBILEM (EDITORIAL)

DIMAPUR AMUNGNÜ, APRIL (RONGCHII) 28, 2024

Asenok nüngdak

Alima nung lia aotsü atema asen nüngdak aika lir. Item nüngdaktemji kong nungi angutsü ta asenoki shisabolur. Item nüngdaktemji bushidang asenok kanga anibelem aser taia menar saka aiben mataloker. Iba ama shisabolu nung asen nüngdak ashidak aser meshidak maka asenok timatemer. Ajisüaka, Laishibai ashir, Tsüngremi Pa akaba yari asenok nüngdak ajak agütsütsü. (Filipi 4:19). Tsüngremi anüng aser alima aser yangji aliba ajak yanglu ta asenoki meteta lir. Aji oda, alima aser anüng nung akaba rongsen ajakji Pa meyong. Asenoki alima nung takartiba Computer agi mapa tapu balala inyaksüsa yanglutetsang, Microsoft Corporation nung mendenbuba Bill Gates akaba indang meteta lir. Par rongsenji America nung sen dollar billion 46.6 dak tali lir. Kenü anogo asen dang Bill Gates-i taküm piyong asen nüngdak ajak agütsütsü ta nangzük ka asünunga, asenok atema koda temoatsü aser anisüngzük süla aser asenok kodaka pelala. Aji oda, asen lima nung, asen yimtak mesüra asen kiyong nung takar kati asen dang kodangsa asen nüngdak adokdir, asen nüngdak ajak pari agütsütsü ta nangzük nunga koda tepelatsüka asütsü. Ajisüaka, Tenyar Paul-i Filipi nungertem dang ashiba asen Tsüngremjibo alima nung takartiba Bill Gates akaba den medemdangtsü makok. Paji asen Tsüngrem. Kotakji Pa menden aser alimaji Pa tetsüng ajemetdak. Asen Tsüngremji Bill Gates ama akaba den atishiteptsüla Tsüngrem masü. Bill Gates akabaji Tsüngrem tsüngdang kanga ilara asütsü aser Tsüngrem akabaji asenok atema tesüngmangtsü. Iba ama alima aser anüng ajak madak kibur aser takar Tsüngremi pa akaba yari asenok nüngdak ajak agütsütsü ta nangzük lir ser nung, asenok nüngdak menguteti timatementsübaji asenoka shiba asütsü ta asenok nüngdak matalokdang bilemdangtsübaji kanga tim asütsü. Asen Tsüngremi asenok senotsü nüngdakbaji meteta lir. Asenok chirnurtem nüngdakji Pai meteta lir. Asenok kibong nüngdakji asenoki Pa dang masüngdangdangyongi Pai meteta lir. Asenok taneptsü nüngdakbaji Pai meteta dang lir. Ajisüaka, kenken asenoki asen nüngdaktemji mengutettsü ama shisabolur. Idangji asenok teimla samar aser mashilen nungi asenoki asen nüngdak abensadaksütsü meranger. Ajisüaka, Laishibaisa ashir, asenoki memeshidangyongi, Tsüngremi asenok kechisa nüngdaker, item ajakji meteta dang lir. (Mathi 6:8). Aji oda, meshiang aser aji nenok nem agütsütsü ta nangzükba Tsüngremji asenoki amangba Tsüngrem ya lir. Ajisüaka, asenoki asenok aginüba o asenok nüngdakba na bendangtetsüla. Tsüngremi asenok aginüba ajak agütsütsü tabo menangzük saka asenok nüngdak ajak Pa akaba yari agütsütsü ta ashir. Aji oda, aiben asenoki asen nüngdak masü saka aseni aginüba apia meshia alitsüa akok. Ashiko asenok nüngdakbajibo tetsüng-teben tajung asütsüa akok ser nung asenoki gari meshira, ashiko ibajibo mangutsüa akok aser anguyonga jangratemabo mamshitetsüa akok. Yakobi ashi ama, asenoki aiben asenok nüngdak nung amshitsü asoshi masü saka asen shi azü jangratem nung amshitsü atema meshir. Ashiko, iba jagi asenoki Tsüngrem dang nüngdaka meshibaji magütsür asütsüa akok. Asenoki amangba Tsüngrem ya kiburtem madak kibur aser tsüngremtem madak Tsüngrem, Pasa takaba, tuluba aser tematiba. Pa alema shinga mali aser Pa makatsü kecha maka. Aji oda, asenok ya iba Tsüngrem chirtemji lir. Tetezü asenok ya chuba chir aser takar chir. Ajisüaka, asenok aika takar chir memesük kanga okrongseta alir aser chuba chir memesük tangar lar kümer meshimetsüa dang lir. Aji oda, kechiba asen nüngdak mengutettsüsa asenok alir, ibaji asenokia kenkenbo bilemdanger asü. Atangji, Pai asen nüngdak ajak meteta lir aser item ajakji asen takarsang Tsüngremi Pa akaba yari agütsütsü. Asenok mapa ajunga agi, Pa dak amangtsü aser asen nüngdakbo ajak Pai agütsütsü. Tanü asenok atema

OLEMSABANG

Secular dang masü Theologian-a mapa mataba tebilemstsü agi tongogo

- L. Kika Pongener

Ttanü asen lima nung Itanür zünger mapa manguba tebilemstsü (Educated un-employed problem) ya kanga tuluka kümogo. Zünger mapa manguba tebilemstsü nungji Secular-tem dang masü, saka Theologian-tema dena mapa manguba tebilemstsü tuluka kümogo. Küm shia HSLC/HSSLC Exam. nung takok angur rongnungi noklang nung shilem pezü-su nung shilem ka (1/4 %) shi-ka Theology azüngi aor. Ano küm shia Theological College balala nungi Itanür noklang aika Graduate/Post Graduate/Doctorate Degree angur. Aji oda, item laishirtemji zünger mapa kecha maka sur odang alinungpo, mimchir dang asünungji karbo timtem marem, mesura temenen tatidang mekotteti aibelena mashilen lenmangi ajemoka aotsü ana nung lir. Tanüngji ni iba ocet nung Secular indangji khen toktsür, Theologian-tem mapa agi mataba tebilemstsü indang ya mejetteta khen suoki yia shisadanga, aser item laishirtemji kodaser mapa agi atadaksütsü (?) ta lenmang kar bushidanga aser shisadangtsü olen kar lemsatepnur. Kechiyong Secular-tem atemabo Govt. mapa nung aitsü, Company mapa nung aitsü aser Private Entrepreneur tenzüka aotsü lenmang sadem-sadema dang lir. Ajisuaka, Theologian-tem atemabo arogo, mungdang, aser Theological College, Hostels...item amala kar nung mapa ngua tenzüksüba dak alaka tanga lenmang aika sadema mali. Tanüngji tangar kintem khen yutsür asen Aotsür-Aor laishirtem atema khen bilema arok külemi lenmang kar bushidangdi.

Ttanü asen Naga lima nunga Theological College aika lapoka aoba angur. Dimapur telongtet nung danga Theological College aika-sa lapoka lir. Ano Dimapur telongtet nung ya Prayer Center aika-sa lapoka lir. Ano Ministry balala nungja balala jateta aika lapoka lir. Ano Ministry karbo mezüngbo Ministry ka dang aliba, meilungi Independent Church (Para Church) küma orr, joko ttanübo Sadi külizüng-a dena agütsür aser Tzü nunga baptisur ta küma aoba angur. Ano item dakji alaka, Rehab Center aser Old Age Home aika lapoka lir. Aji oda, item ajunga lapoka aobaji Secular-temi lapokba masü, Theologian-temi lapoka aoba lir...Aji oda, ibaji tanga kecha agi masü, saka Theologian-tem mapa manguba tebilemstsü agi lapoka aoba ta küli ka angur. Kechiyong item Theological College, Prayer Center, Ministry, Rehab Center, Old Age Home aser Para Churches lapoka/tenzüka aoba ajak nungji, Theologian-tem arogo aser mungdang nung mapa mangurtem pei sasa tenzüka mapa inyaka aoba angur. Tanüngji item mapatem jagi Theologian-tem mapa agi mataba tebilemstsü ya ulura ka küma odar ta tejangja küli angur. Aji oda, item ama tenzüka aoba nungji tangatetba tajung aser shisatsü tesadem agi tenzüka ora, arogo aser mungdang atema nukdang tajung ka-ka asütsü, aser Kibubar lu (Mission) wadang tuluba awa-a oa inyaksü. Ajisuaka, shisatsü tesadem agi meinyakra, itemji lapoka/tenzüka aoba ajanga arogo aser mungdang nung tebilemstsü adoktsüa ana nung lir.

Surabangla, laishirtem mapa agi mataba tebilemstsü ya koktetsü atema arogotemi inyaksü lenmang karbo lir mali ???...ta khen arok külemi shisadangi. Asenoki jungjunga shisadanga, arogotemi inyaksü lenmang karbo lir amai bilemer. Ttanü ABAM küpok lim arogotem asadanga reprangdanga, arogo tulu aika lir...Jila tulu nung aliba lim arogotem aika züngsem noklang aika aser merijang junga aliba arogotem lir. Lim arogo kar nungbo Fellowship 8-9 tashi lemsar aliba arogotem lir. Ni tali rajema angatetsü atema arogo kar tenung tetshinur...Tanüngji item arogotem jagi mejashitsü ta amanger. Mokochung Town Ao Baptist Arogo (MTABA), Kohima Ao Baptist Arogo (KABA) aser Dimapur Ao Baptist Arogo (DABA) ama...item arogo nungbo, ashiko, Fellowship 8-9 tashi lemsar alitsü akok. Tanüngji, takoktsü lenmang dang lira, aser tim amai angatetra...item arogotem nung aliba Fellowship shiaji Independent arogo ka-ka küma razüka yok nungbo laishirtem mapa agi mataba tebilemstsü khuret ya terabo koktetsü sudi ta shisadanga bilemdanger.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Indonesia nung Tenla ki anüker police ka nem tetushi agütsü



April 27, 2024: 2018 küm May ita nung Indonesia kübok Surabaya nung kiralongrartemi Tenla ki asem bomb amshia amakba mapang asür police ka nem Indonesian National Police-i tetushi agütsüogo, ta International Christian Concern (ICC)-i metetdaksü.

2018 küm May 13 anepdang 6:30 ako nung lanur tebur ana motorcycle ka nung aruba sülen Immaculate Santa Maria Catholic Church Tenla kidang bomb pokdaksü aser 7:15 ako nung Muslim tsür kati lar jala ana anisemer Indonesian Christian Church Tenla kima bomb ka pokdaksü; iba sülen 7:55 ako nung nisung kati gari ka nung bomb pongu bener oa Surabaya Central Pentecostal Church (GPPS) Tenla kima pokdakja liasü.

Tenla ki asem nung bomb pokdaksüba lendong nungji nisung 15 aser 40 dak tema yiru.

Iba anepdangji Gubeng Surabaya Police, Ahmad Nurhadi-i SMTB Tenla kiji nüka liasü. Bomb apokba ajanga Nurhadi süchia ao aser pa shia arudangbo pai tenük agi kecha mangu aser pa tetsung anaprongla sükdanga liasü.

April 22, 2024 nü Indonesian National Police-i pa nem award agütsüba sülen pai, "Surabaya nung aliba SMTB Arogo Tenla kima kiralongrartemi bomb amshia amakdang ni-a yirutsü ta ni memeteti liasü," ta ashi.

Iba tatalokba sülen Paramedics-i pa hospital-i anir ao aser ita asem tashi hospital nung treatment agia liasü. Pa tenük aser tetsung surgery trokben agi saka pai joko tenük agi

mangur aser tang tashi mejajateti wheelchair amshir.

Nurhadi-i, "Ozü lenirtem aser külem tenzükertemi ni aser ozü kibong maneni nungita yariba aser treatment agidang yariba atema parnok ajak dang ni pelar," ta metetdaksü.

Indonesian National Police-i ashiba agi, 2018 küm May 13 nü Tenla ki asem amaker kiralongrartemji ajak kibong ka nungi dang züngsemtem liasü aser parnok ajakji Islamic State indang branch Jamaah Ansharut Daulah (JAD) nung züngsemtem liasü.

Indonesia nunger nütsung shilem 90 bo Muslim nunger lir aser tanüngba nütsung shilem 10 ji Khristan, Hindus aser Buddhist yimsü amangertem lir.

ANOGO ABEN TSÜNGREM DEN

TAOCHI AGI METENDAKTSÜR

"Saka Khrista Yisu nung aliba talangzükba ajanga pa taochi agi angati sempet ka ama parnokji metendaktsür."
Rom 3:24

Alima ozüngji tamajunger aitsütsü aser merenshitsü atema yanglu, Tsüngremer temeshiba ozüngji temenenpur aitsütsü aser merenshitsü atema lir. Tamajungera süang, temenenpura süang shinga ozüng tsüngdang temeten mangutsü. Kechiyong Rom kaket nung "temenen taaji tasüba" ta shiogo.

Saka nisunger mapaji reprangdangra tamajunger, aibelener sen agi metentsüdag metena alir akoksaba angutsü. Saka asen Tebu Tsüngremi inyakba mapaji reprangangra tesüngmangtsü ka lir. Kechiyong Tebu Tsüngremi techir Yisu Khrista asen tai temenen taa asoshi taküm agütsü nung asenok temeshiba ozüng tsüngdang metendaktsüogo.

Temeim adianutem, tulu ka aibelen saka angati temeten anguba purtemji asenok ya lir. Nai aser ni aji angateta lir ma? Ibaji kechi agi ta süra Yisu Khrista temeim taochi agi koba pai kangki tong nung sayu iba tenla jagi na aser ni metendaktsü. Aseni aibelenba tai temenen nungi nüji angutsü Kibubai asen dak nungi ali rongsen tenla tulu mesüra, mapa tajung aika inyakba makanger saka asen temulungjang teraksa pai aginer. Nisungi metendaktsüba Kibubai magizüktsü, saka pai metentsübabo shingaia nonga ta ashitsü makoktsü. Yisui metentzüba taküm ama alitsü merangdi.

Myanmar nung sepaitemi Amongnü tekülem sentong-a nokdang

April 27, 2024: Myanmar nung sepaitemi Khristan nütsung teimba aliba Chin state yimtiba nung Amongnü tekülem sentong densema Khristantem tekülem sentong ajak nokdangogo.

Lisopur telok balalai sepaitem amakba sülen sepaitemi Khristantem tekülem sentong ajak nokdang.

April 22, 2024 nü Chin state ketdangsertemi yimsü dak sendakba sentong agitsü atema nisung pongu dak tali madenshitsü tuyuba den külemi India aser Bangladesh den arrtsülen aliba Hakha nung dokan melapoktsü tuyuogo.

April 26 nü osangbener den jembidang Arogo lenir kati, "Chin state nung kibong shia züngsem pongu dak tali lir. Anungji ketdangsertem tetuyuba tasenba kübok tekülem sentong agitsü mesüra sarasademtsü atema nisung madenshitettsü," ta metetdaksü.

April 24 nü Khristantem ketdangsertem den senden ka mena item tenokdangba agientsü mepishi, ajisüaka ketdangsertemi magizük.

Osang angazükba agi, item tetuyubaji June 22 tashi alitsü aser ibaji ajanga Catholic, Baptist aser Anglican densema denomination balala indang Arogo 14 kongshitsü.

Arogo lenir katisa, Khristantem asüpila sentong agiba dak alaka sarasadem sentong mesüra tekülem sentong agitsü atemabo anogo pongu jelia temelaba meshitsüla, ta ashi.

Hakha nung aliba Arogo ka nung inyaker Augustine-i, "Tejashitsü kaji, tekülem sentong ajak nokdangogo," ta metetdaksü.

April 12 nü Chin Defense Force züngsemtemi sepaitem gari mendanger amakba mapang nung sepaia minister tem densema sepaia aika yirua liasü.

Yaküm February 2 nungi tenzüka Chin state kübok jila tenet nung martial law

den curfew ozüng benoka lir aser nisung pongu dak tali adenshitsü memelar.

Chin state nung nütsung shilem 85 bo Khristantem lir. Iba state nung Khristan 478,000 lir aser parnoki sepaia yimsüsüba anema sashia nokdaker.

April 25 nü sepaitemi Chin state kübok Mindat jila nung aliba Vawmm'tu Hospital amakdang nisung ana süogo, ta Chin Defense Force-i metetdaksü.

Myanmar nung nisung 78,200 jenshiogo aser nisung 60,100 bo kidanger linük India nung jenoka lir, ta April 22 nü UNHCR-i metetdaksü.

Myanmar nung Khristantem reju 55 densema yimsü dak sendakba tesem 100 dak tali raksatsüogo, ta Chin Human Rights Organization-i metetdaksü.

Nütsung million 54 aliba Myanmar linük nung nütsung shilem 6 bo Khristanatem lir. Iba linük nung nütsung shilem 89 bo Buddhist lir.

ACN-i Mongolia nung Bible project yaritsü

April 27, 2024: South Korea nung Khristan charity telok kati Mongolia nung Khristantem atema Laishiba meyipzüksüba project ka yaritsü.

Aid for the Church in Need (ACN) Korea-i Laishiba meyipzükba adoktsü atema dollar sen 100,000 (Korea nunger won sen million 137.5) agütsütsü, ta Catholic Peace Broadcasting Corporation (CPBC) of Korea-i metetdaksü.

Mongolia linük nung Khristan nütsung 40,000 shi lir aser iba nungjagi Catholic Khristan nütsung 1,400 shi lir. Catholic Khristantem Protestant version Liashiba azünger. Iba Laishiba nung kaket 66 lir saka Catholic Laishiba nungbo kaket 73 lir.

Ulaanbaatar nung Cardinal Giorgio Marengo-i, "Mongolia nunger Khristantem osangtajung proktsü atema timtem ajangshir, kechiyong parnok ket nung Protestant Laishiba dang lir," ta metetdaksü.

Catholic Laishiba Mongolia oshi nung meyipzüktsü atema 2027-2028 küm atemzükba lir;

iba project ajanga mapang talangka nungi Mongolia nung Arogoi timtem ajangshia aliba bentettsü, ta Marengo-i metetdaksü.

ACN Korea-i 2024 küm nungi 2027 küm tashi parnoki senotsü agi Bible translation project yaritsü, ta CPBC-i metetdaksü.

Aid for the Church in Need (ACN) ya alima tesem balala nung reshikangshi ajangashiba Arogotem aser sensaker Arogotem yariba telok ka lir.

ACN Korea branch kati ashiba agi, Mongolia nung Catholic Khristantemji tang mezüng Catholic tamang agizükertem mesüra parnok chirnurtem lir.

ACN Korea-i Syria nung Khristantem, Israel nung bendanger Khristantem aser tanga linük balala nung refugee Khristantem yaritsü atema "2023 Advent and Christmas Campaign" ayongzükba agia liasü.

ACN Korea-isa "One Smile" project tenzüka lir aser iba project kübok parnoki Khristmas mapang nung Syria nung tanurtem nem süoshi agütsür.

**AO OSHI ANGAZÜKDAK:
TANÜ ANGAZÜKTSÜBA OJANG**



Süngki

(n) ozüi süng mechipoka tesep yangluba (nest in hollow of a tree)

* Tenem ozüi süngki nung tesep yanglur.

Süngki

(n) süng ayudak tesem (wood storage)

* Ki shia süngki balaka yanglutsü nüngdaker.

OLONG PAITEP # 6770

1		2			3		4		5
				6		7			
8									
						9			
			10						
11									12
					13		14		
15									
16							17		

TIPLÉN

- 1. Nüji masü - (4)
- 3. Technütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasademdang tembang - (4)
- 4. Tarutsü indang ashitem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

OLONG PAITEP # 6769 TELANGZÜBA

TIPLÉN :

- 1. Mera, 5. Ocet, 6. Tekolok,
- 10. Ana, 11. Bilemdang,
- 12. Kar, 14. Chinüing, 16. Ajok,
- 17. Tawa.

LANGTSÜNGLEN :

- 1. Metsü, 2. Asü, 3. Yiar,
- 4. Tebang, 7. Kilir, 8. Ber,
- 9. Oda, 10. Anasa, 11. Bangja
- 13. Shin, 15. Nit.

NAI-A YA METETTER MA

WOMEN'S T20I CRICKET NUNG OTSÜ TASEN KA



Indonesia tsür Rohmalia-i Women's T20I cricket nung otsü tasen ka yanglutetogo. Arishi küm 17 tain Rohmalia ya off spinner ka lir aser April 24, 2024 nü Bali nung Mongolia den asayadang lai 7 for 0 ngutet. Iba asaya nung Rohmalia-i mezüingbuba ball aondang wicket ka agia liasü. Iba asaya nung lai 3.2 overs aonba nung wicket 7 tashi ducks ngudakja liasü aser run ka danga magütsü. Indonesia-i runs 151 for 5 yangluteta liasü saka Mongolia pur runs 24 nung wicket ajak temadok.

MULUNGNEN O



December 26, 1958 – April 17, 2024

Onok, asür **Rev. Prof. Dr. Lima Jamir** (Yaongyimsen) kibongi, shirnokisa pa shiranga alidang aser asüba mapang sarasadem, nebo, mapang aser rongsen agi miimogo, nenok ajak dang kanga pelaba lemsateper. Mejeta item dang ya pelar:

- | | |
|----------------------------------|---|
| 1. Chumoukedima Ao Baptist Arogo | 11. Garo Baptist Convention |
| 2. Yaongyimsen Baptist Arogo | 12. Eastern Theological College, Jorhat |
| 3. Nukshiyim Baptist Arogo | 13. Harding Theological College, Tura |
| 4. Liruyim Baptist Arogo | 14. CIHSR, Dimapur |
| 5. Dimapur Ao Baptist Arogo | 15. Eastern Theological College Alumni |
| 6. Delhi Ao Baptist Church | 16. Yaongyimsen Laishir Telongjem |
| 7. Jorhat Ao Baptist Arogo | 17. Chumoukedima Mangmetong Fellowship |
| 8. Assam Valley Baptist Mission | 18. Chumoukedima Mangmetong Union |
| 9. International Ministry, USA | 19. Chumoukedima Yaongyimsen Tamang Telongjem |
| 10. ABAM, Impur | 20. Chumoukedima Yaongyimsen Union |

Onoki pelaba kija aser lokti shia tenüing teta meshitetaka, asen Kibuba Yisu Khristai nenok ajak moatsütsü aser Pa temeshi hatir ama maneni amshitsü onok teimla aser sarasadem.

- Temeim Kinüngtsü, Tanurtem, aser Kinungertem.

Manipur nung küm ka rarayonga aruaka tensa mesüingjemer: COCOMI

Imphal, April 27, 2024
(Agencies): Manipur nung Meitei nunger telok Coordinating Committee on Manipur Integrity (COCOMI)-i May 3, 2024 nü public sentong ka alitsü metetdaksüogo. India sorkari Manipur tebilemtsü asoshi teinyaksü tim meinyaker ta COCOMI spokesman Khurajam Athouba Meitei-i tanü ashi.

May 3 public sentong nung agütsütsü aser narco-terrorist dak sendakba kulikakettem sayütsü ta pai ashi. Sorkari iba tebilemtsü atema mapa inyakba, Suspension of Operation, ozüing alema aruba aser poppy alu ayimba ken o tem iba senden nung benoka jembitsü. Honibarnü Manipur nung

telok ana tsüingda khatepdang arishi küm 33 tain ka khaset, ta police-i ashi. Hokolbar ayaterm nung Kangpkopi aser Imphal East district tem tsüingda aliba Sinam Kom yimtsüing nung khatep. Idangji 'village volunteer' ka samar bushitepa aru aser Honibarnep pa indang tasüingangu. Iba nisung ya LaishramPrem ta jangjaogo, ta police-isa ashi.

Amit Shah-i April 29 nü Guwahati nung roadshow ka alitsü

Guwahati, April 27, 2024
(Agencies): Union Minister Amit Shah-i April 29, 2024 nü Guwahati nung road show tulu ka ayonga agitsü. 2024 Lok Sabha elections shilem tasembuba agitsü lia iba sentong ajanga nisung aika atsür arutsü imlar. "Amit Shah-i April 29 nü Guwahati nung roadshow ka alitsü. Iba roadshow ya Cycle factory-Lal Ganesh tesem nung

agitsü" ta Assam Chief Minister Himanta Biswa Sarma-i ashi. Iba sentong atema kanga junga renemogo aser traffic timtem kecha magütsü agitsü ta CM Sarma-isa ashi. Himanta Biswa Sarma also expressed his concern towards the trend of low voter turnout in the Guwahati Lok Sabha seat. "Guwahati nung low voter turnout tebilemtsü lir aser iba atema asenoki mapa inyaktsüla.

Shiba arudir aruaka BJP nem vote enoktsür saka tanga Lok Sabha mententem den medemdangra voter percentage kanga ajema lir. Guwahati nung nisung lakh 20-i vote enoktsüra idakji BJP atema vote lakh 5 lir" ta CM Sarma-isa ashi. Guwahati Lok Sabha menden nung Congress candidate Mira Borthakur Goswami-i BJP candidate Bijuli Kalita Medhi den tokteper.



Dimapur Govt College Ao Kaketshir Telongjem küm tatem aser graduate ser aoertem den tepila sentong April 27, 2024 nü Dimapur nung alidang tongti o jembir Wt.Dr. Maongkala Longchar, Asstt. Professor, DGC-i jembiba noksa nung angur. Iba sentong nung lai tsürabur mapang nungi amanga aruba sobaliba tajungtem mamadoki mapa kuma benshitsü asoshi kaketshirtem ajungshia liasü. Iba sentong nung DGCAKT nung ketdangpurtem tasen shimogo.

US-i Ukraine nem Patriot missiles agütsütsü

Washington, Rongchii/April 27 (Agencies): UKrain nem USD billion 6 alang military teyari talila agütsütsü aliba nung Patriot air defence missile systems densema lir, ta Defense Secretary Lloyd Austin-i Hokolbarnü sangdong ka ajanga metetdaksü. Pai ashiba agi, Russia-i Ukraine amak tenzüka sülen tang security teyari timtiba agütsütsü lir.

Tir Joe Biden-i, Ukraine nem USD billion 61 alang teyari agütsütsü atema bill nung sign asüba sülen iba hopta tang agi tanabenbuba Kyiv nem teyari agütsütsü sangdongogo.

Teyari agütsütsü aliba nung National Advanced Surface-to-Air Missile Systems, mesüra NASAMS atema injang talila, Western air defence launchers ajungkettsü atema hadir talila, missile aser radar tem densema lir aser iba ajanga Ukraine indang defence system tali tajungba küma ajungkettsü koba Soviet era indang hadirtem lir.

Ukraine Tir Volodymyr Zelenskyy-i, Hokolbarnü Ukraine Defense Contact Group den nüngdakba

sensaksemeogo. Ukraine Defense Contact Group nung linük 50 shi densema lir aser parnok Pentagon-i ayongzüka virtual senden ka menogo.

Iba telok tetetter küm ana ajungba mapang iba senden mena liasü. Austin-i ashiba agi, iba telok yagi 2022 küm April ita nungi tenzüka Russia-i amakba nokdangtsü atema Ukraine nem ammunition million aika, rocket system, armoured vehicle aser jet tem densema agütsüogo.

Zelenskyy-i, Ukraine nung yimitem kümzüka ayutsü atema Patriot systems tenetbosa nüngdaker ta shiogo.

"Parnok ket nungi Patriot system aser missile tem tangsa tang nüngdaker. Iba ajanga tang nisung takütem kümzüktettsü," ta Zelenskyy-i ashi.

US nunger ketdangsurtemi, Ukraine nung rara indang rasa shiogo aser ashiba agi, sepaitem injang agi anünger aser Russia nunger sepaitem tejakdangi odar.

Senden tembangba sülen Pentagon nung osangbenertem den sensaksema mapang Austin-i ashiba agi, Patriot systems talila agütsütsü atema

US-i allies tem den sendaktepa inyaksangshidar. Ajisiaka pai US version tem yoktsü atemabo tenangzüka magütsü.

Pai ashiba agi, iba ken o densema tanga onüktem sensaksemtsü atema pai anogo ishika tsüngda Europe nung lenirtem ishika den sensaksemtsü.

"Parnoki Patriots dang nüngdaker masü saka tanga system aser interceptor tem nüngdaker," ta Austin-i ashi.

Austin-isa, Ukraine nem kechi hadir agütsütsü ta asadanga mapang pai parnok den sendaktepa aliba linüktem dang jenjang tera talila agitsü atema asüngdangtsü, ta ashi.

Linüktem aikati Ukraine nem Patriot air defence systems agütsütsü atema atsüayonger, kechiyong parnok ket nunga peria mali aser parnokia pei linük kümzüka ayutsü atema iba ya nüngdaker ta bilemer.

US-i teyari agütsütsü aliba nung High Mobility Artillery Rocket System, mesüra HIMARS, Switchblade aser Puma drones, counter-drone systems aser artillery densema lir.



OFFICE OF THE
MERANGKONG SENSO TELONGJEM TULI
P.O. Tuli Town - 798618
Dist. Mokokchung : Nagaland.

TENUNGSANG AGÜTSÜR

Merangkong Senso Telongjem Tuli ajanga Merangkong Senso tajung temi takok aser konang-nüngsang tulu bener arutsüba asoshi tenüngsang aser tetushi tulu agütsür.

1. **Wb. MARSANEN IMSONG**, Lt. Yaongnok Imsong aser Lt. Tongpangkoka- er jabaso Ao Senden lenitsü asoshi President shimtetba asoshi.

2. **Sp. BENJUNGAKUM JAMIR**, Wb. Meyidangit aser Wt. Moanaro- er jabaso NBSE High School Leaving Certificate Examination 2024 nung Top 9th jenjang ngutetba asoshi.

Merangkong Senso Telongjem Tuli, ajanga tarutsü nung nenok maneni tuluba jenjang nung takok angutsüsa aser nenok sempet ajanga nuburtem asoshi temoatsü südakjang da sarasadema atar.

Ano, Merangkong Senso Telongjem ajanga maneni HSLC aser HSSLC tatidang 2024 nung lanur shirnoksa takok nguogo, nenok ajak dang pelaba metetdaksür. Tarutsü nunga nenok takok angutsüsa aser nenok sempet ajanga nuburtem asoshi temoatsü südakjang ta sarasadema atar.

IMKUMZUKBA

President

Merangkong Senso Telongjem Tuli

MOASASHI

General Secretary

Merangkong Senso Telongjem Tuli

CHRISTIAN HIGHER SECONDARY SCHOOL

NYAMO LOTH ROAD, DIMAPUR - 797 112, NAGALAND

IN LOVE AND



TRUTH WE STRIVE

Congratulations

Oh give thanks to the LORD, for he is good; for his steadfast love endures forever! ~ I Chronicles 16:34

HSLC / HSSLC TOPPERS 2024



MHACHILO YANTHAN
HSLC - 1st Rank



SURUCHI BHARTI
HSLC - 8th RANK



TOKALI HAWOMI
HSSLC - 3rd RANK (ARTS)



MAYSHA PATHAN KHAN
HSSLC - 9th RANK (ARTS)



KOYEL SUTRADHAR
HSSLC - 5th RANK (COM.)

CHSS family extends heartfelt congratulations to all our achievers for the remarkable performances in the 2024 Board Examinations. We are, indeed, very blessed and inspired by your exceptional accomplishments.

Your unwavering dedication, perseverance and hard work have set a standard in the pursuit of goals.

May the Almighty God continue to bless and prosper you all in your academic journey and beyond.

- A Felicitation Programme for the toppers will be held on 4th May, 2024 at 8:30 a.m in the Covenant Hall.
- All toppers are requested to attend the function along with parents in regular school uniform.

Sd/- S. Moatemsu Walling
Principal

Houthi teloki oil tanker ka raksatsü

Washington, Rongchii/April 27 (Agencies): Israel-i Gaza amakba anema rong aser tesem balala tali amaktsü ta nangzüker inyaksangshiba mapang Yemen nung amendaker aliba Houthi teloki oil tanker ka raksatsü aser United States indang MQ-9 Reaper drone ano ka khazüka yokogo.

Iran den sendaktepa aliba Houthi telok military otongdar Yahya Saree-i Honibarnü ashiba agi, parnoki Temerem tzüyim nung British meyong oil ship Andromeda Star naval missiles amshia amak aser indang indanga kashiogo.

US military-ia, Houthi puri antiship ballistic missiles asem khaloktsü aser MV Andromeda Star raksaja liasü, ta ashi. Iba rong ya tawa Seychelles nung züngoksema aliba company kati yoka liasü, ta Reuters sangdong ka ajanga metetdaksü.

"MV Andromeda Star tera raksaogo saka maneni inyaksangshidar," ta US Central Command (CENTCOM)-i X sabang ajanga metetdaksü. Iba lendong nung nisung asüba mesüra yiruba osang kecha mali, ta shisem.

Houthi military otongdarisa Yemen nung parnok indang air defence forces-i US military indang MQ-9 Reaper attack drone ka Saada governorate kolak nung missile ka amshia khazüka yokogo, ta ashi.

US military-i, drone dak sendakba nung kecha telangzüba magütsü, saka US broadcaster CBS News-i, MQ-9 ka Hokolbarnü Yemen nung tsükokogo, ta ashiba den ken o bushisingdangdar ta shisem.

Gaza nung rara tenzüka sülen Houthi puri tang agi tasembenbuba US indang US attack drone ka khazüka yokogo. Mezüngbuba drone ya November ita khazüka yok aser tanabuba ya February ita khazüka yoka liasü.

Archery World Cup: India team-i gold medal asem angu



Rongchii/April 27, 2024 (Agencies): Shanghai (China) nung tang asaya aliba World Cup Stage 1 nung Honibarnü India team-i non-Olympic compound archery team events nung gold medal asem nguogo.

Tetsür compound team event nung India team nung Jyothi Surekha Vennam, Aditi Swami aser Parneet Kaur nungeri point pezü dang monguteti Italy team 236-225 agi koka mezüngbuba gold medal ngua liasü.

Tebur team nung Abhishek Verma, Priyansh aser Prathamesh Fuge nungeri tetsür team dang nungi tajungba sayateta point ana dang mongutet, aser parnoki Netherlands nunger asayar Mike Schloesser, Sil Pater aser Stef Willems nunger 238-231 agi koka liasü.

Temeyoktep team asaya final nung second-seeded Jyothi aser Abhishek nati Estonia nunger asayar Lisell Jaatma aser Robin Jaatma na 158-157 ta point ka agi koka liasü.

Asian Games championship tesüsabuba koker alila Jyothi-i

iba asayamung nung gold medal ana nguogo aser la kija asaya nunga semifinal asayatsü.

Priyansh-a kija asaya nung medal kabosa angutsü atema meranga asayadar.

Recurve asaya atema medal round Deobarnü asayatsü aser iba asaya nunga India team-i gold medal ana angutsü timla lir. Iba asaya yabo Olympic nung asayaba asaya ka lir.

India tebur team Olympic champions South Korea den gold medal atema asayatsü.

Kasa mapang nung recurve section nung Deepika Kumari kija asaya nung medal angutsü merangdar aser la semifinal nung South Korea tsür ka den asayatsü.

Tetsür compound team shirnok top seed ama qualify asü parnoki arrow 24 akhaba nung point pezü dang monguteti Honibarnü mezüngbuba asaya nung Italy team koka liasü.

Mezüngbuba set asem kong arrow trokrok akhar, iba nung Jyothi, Aditi aser Parneet nungeri perfect 10 anaben dang mongutet aser Marcella Tonioli,

Irene Franchini aser Elisa Roner nunger dang nungi 178-171 agi timba aküm.

Set pezübuba nung India team-i point ana dang monguteti parnok point 11 agi timba kuma asaya akok.

Tebur team shirnok pezübuba nung qualify liasü, parnoki mezüngbuba set nung point tangutsü aliba ajak angu aser taruba end ana nung point ana dang mongutet aser tatembangbuba set nunga point 60 prongla nguteta parnoki asaya akok

Compound temeyoktep team event nung Jyothi aser Abhishek nati point 40 prongla nguteta tena point asem agi tejakdang liasü.

Mezüngbuba set nung point asem mongutetba ajanga Estonia team akoksa shirnoki round asem nungbo point 40 prongla ngua liasü. Tatembangbuba set nung India team-i point 40 angutsü aliba nungi asaya akoktsü atema point 39 dang nüngdaka liasü aser tenati iba point nguteta linük asoshi tasembuba gold medal ngutsü.

Klopp melena Arne Slot shimtsü mulungtepogo

Rongchii/April 27, 2024 (Agencies): British media sangdong balala ajanga ashiba agi, Arne Slot nem Jurgen Klopp melendaktsütsü atema Liverpool aser Feyenoord na mulungtepogo.


Press Association sangdong ka ajanga ashiba agi, arishi küm 45 tain coach shiba ano contract küm ana anunga lir pa atema compensation package-a mulungtepogo. BBC-i ashiba agi, tenanzüktepba ya pound million 9.4 alang asütsü.

Slot-ia, Liverpool coach mapa abentsü atema temulung lema bilemba lemsatepogo aser Brehostibarnü ashiba agi, "ni Liverpool-i oner. Club ana tsüngda tangatetep ka dangi arur marur aji atadar. Ni kanga temulung lema bilemer.

AZ Alkmaar nung kanga takok ngua inyakba sülen pa Feyenoord nung 2021 küm aden. Mezüngbuba season nung Slot-i par team Europa Conference League final tonga ani kong parnoki Mourinho-i aniba Roma team goal 1-0 agi makok. Tanabuba season nung pa lenisüba nung par team-i küm 24 sülen league title tanabuba akok aser iba sülen pai club den küm asem atema tenanzüktepba yanglua liasü.

Küm teku tashi Liverpool nung kanga takok ngua inyakba sülen Klopp tang asaya aliba season tembangba sülen club toktsütsü. Pa lenisüba nung Liverpool puri 2019 küm Champions League akok aser 2020 küm Premier League koka liasü.

Slot dak sendakba nung



Arne Slot

Klopp-i, "ni par team asayaba yimya agi jangra ademer. Pa shimtsü süra paia iba mapa inyaktsü jangradaktsüner. Ni pa memetet, saka pa meteta alir kari pa nisung tajung ta shiogo. Anungji pa coach tajung dang masü nisunga tajung lir, koba kanga junger," ta ashi.

Feyenoord pur tang Eredivisie table nung PSV Eindhoven sülen tanabuba jenjang nung lir. Kasa mapang nung Liverpool pura Premier League nung tang tasembuba jenjang nung lir, parnok Arsenal dang nungi point asem aser Manchester City dang nungi point ana agi tajemba lir.

Mezüngbo Klopp melena taoba mapang Liverpool midfielder aser Bayer Leverkusen manager Xabi Alonso shimtsü asadanga liasü, saka Bundesliga mezüngbuba akokba sülen Alonso-i Leverkusen nung dang inyaktsü shimogo. Sporting Lisbon coach Ruben Amorim dena sendaktepa aruogo, ajisüaka pa taruba season David Moyes melentsü atema West Ham den sensaksemdar.

Madrid Open: Alcaraz & Sabalenka na 3buba round-i iogo



Alcaraz & Sabalenka

Rongchii/April 27, 2024 (Agencies): Madrid Open tesüsabuba koker aliba asayar Carlos Alcaraz aser Aryna Sabalenka napronglai Spain yimtiba nung Hokolbarnü mezüngbuba asaya koka tasembuba round tongtetogo.

Tebur kija asaya nung Alcaraz-i, Alexander Shevchenko 6-2, 6-1 agi ayonga koka liasü. Ajisüaka Sabalenka-ibo set asem asayaba sülenang Magda Linette koka liasü.

Teburtem rongnung

tasembuba jenjang nung aliba asayar Alcaraz, teka yiruba ajanga Monte Carlo Masters aser Barcelona Open nung masayatet, ajisüaka iba asayamung nungbo kanga junga asaya tenzükogo.

Tasembuba round nung Alcaraz, Thiago Seyboth den asayatsü, shibai Lorenzo Musetti 6-4, 6-4 agi kokogo. Alcaraz-i iba asayamung ya 2022 aser 2023 küm koker lir.

Tebur kija asaya nungsa Andrey Rublev, shiba asaya

pezü tashi khen danga takok monguteti aruogo, pai 6-1, 6-4 agi Facundo Bagnis kokogo.

Kasa mapang nung Germany nunger asayar Alexander Zverev, shibai iba asayamung 2018 aser 2021 küm koker lir, pai Borna Coric 6-3, 6-2 agi ayonga koka pa-a tasembuba round tongtetogo.

Tetsür asaya nung Sabalenka-i 6-4, 3-6, 6-3 agi Linette koka liasü.

Maneni tetsür kija asaya nung Elena Rybakina-i Lucia Bronzetti 6-4, 6-3 agi kokogo. Kazakhstani tsürla yagi taküm kanga junga asaya arudar aser taoba hopta Stuttgart asayamung akokba sülen taküm asayamung asembuba kokogo. Rybakina taruba round nung Egypt tsür Mayar Sherif den asayatsü, shibai Marta Kostyuk 6-2, 7-5 agi kokogo.

China tsür Zheng Qinwenbo tia maka yiruba ajanga masayatetsüsa aküm. Yulia Putintseva den asayaba mapang la 7-5, 2-0 agi tejakdang liasü saka la yiruatok.

Arishi küm 16 tain Mirra Andreeva-ia 4-6, 6-3, 6-3 agi Linda Noskova kokogo.

Senior Men's Inter-District One Day asayamung osang

Dimapur, Rongchii/April 27 (TYO): Senior Men's Inter-District One Day Tournament 2024 tenzüker tasembuba anogo district team tem tsüngda kanga toktepa asayaogo.

Nagaland Cricket Stadium nung Tseminyu aser Longleng na asaya Longleng-i wicket ka agi koka liasü. Asaya nung Arjun Kumar Yadav-i run 20 yangluba den wicket 6 agiba atema pa nem Player of the Match naroküm agütsü.

Tseminyu team-i wicket 10 out sür run 115 yanglu. Parnok rongnungi Ntsenlo Semp-i run 42 yanglua liasü. Run arishiba mapang Longleng-i wicket 9 out sür run 116 yanglua iba asaya koka liasü.

Tseminyu vs Longleng

Tseminyu: 32.1 overs nung run 115/10 (Ntsenlo Semp 42 (34), Nuntlo 16 (23) & Arjun Kumar Yadav 6/9, Mungkhum



2/41)

Longleng: 22.2 overs nung run 116/9 (Rajesh Das 35 (26), Arjun Kumar Yadav 20 (22) & Nuntilo Mach 4/27, Ntsenlo 4/53)

Qualifying Rounds tembangba sülen Group A nungi Mon aser Group B nungi Longleng qualify süogo aser parnok Senior Men's Inter-District One Day Tournament 2024 final round tongtetogo.

BILEMDANGANG

"Nai kodang na kechi aka aji meimdir, na ajak akaba den saku lir".